

ARLEF AL PREMI LETERARI DOLFO ZORZUT

GIACOMO VIT AL VINÇ CUN "CIASSOLIS CIDINIS" LA SEZION POESIE COVAZ E ARECCHI EX AEQUO TE NARATIVE

Te sezion students prin premi a Rossella Dosso de "G.Pascoli" di Cormons

Udin, ai 20 di Mai - Un storic di Pavie, Alberto Arecchi, e il gjornalist e scritôr Roberto Covaz a son i vincidôrs de sezion narrative de tierce edizion dal premi leterari intitulât ae memorie dal prosatôr cormonês Dolfo Zorzut.

"Il nastrino rosa" e "Borotalco. I cantierini di Monfalcone sperduti nell'amianto" a son lis dôs oparis che a àn convinçût la jurie che e à invezit assegnât il premi de sezion poesie al fondadôr dal grup Majakovskij, il furlan Giacomo Vit, cu la sô "Ciassolis cidinis" (segnalant ancje Aldo Rupel cun "Fruti e verdure").

I autôrs dal premi trilengâl - talian, furlan, sloven - a son stâts premiâts te sale di palaç Locatelli a Cormons te suaze de " Fieste de Viarte ", l'event inmaneât de associazion "Amis da Mont Quarine " che e je stade ancje organizzadore dal premi dutun cun Comun, Societât Filologjiche Furlane e in colaborazion cu la ARLeF, Agenzie regionâl pe lenghe furlane.

L'idee dal premi bienâl par ricuardâ Dolfo Zorzut (Cormons 1894-1960), autôr di tancj tescj par talian e furlan, co fondadôr de Societât Filologjiche Furlane e je stade dal president onorari de associazion, Eraldo Sgubin, che al ritignive dovût no dismenteâ la impuartante figure di Zorzut te storie de leterature furlane.

Une impuartance che e je stade marcade tal intervent dal diretôr de ARLeF, William Cisilino, che al à premiât i vincidôrs insiemit al stes Sgubin, al sindic di Cormons Luciano Patat, al vicepresidente de Filologjiche Renzo Medeossi, ae presidente de associazion "Amis da Mont Quarine" Elena Gasparin.

"Il Friûl Orientâl al à dât un contribût pardabon fundamentâl ae storie de leterature, tacant dal Votcent e vie indevant pal Nûfcent, sore dut par chel che al inten la prose. Il premi Dolfo Zorzut e je duncje une ocasion par valorizâ chê memorie e chest teritori", al à afermât Cisilino, confermant ancje che pe

prossime edizion la poie de ARLeF "e sarà ancjemò plui fuarte par fâ inressi une iniziative culturâl impuartante par madressi la leture e la scriture".

Chest an la jurie formade dal scritôr e gjermanist Hans Kitzmüller e di Ferruccio Tassin (pe lenghe furlane), Silvana Vogrig (sloven), Alessandro Pesaola (assessôr comunâl ae Culture) e Renzo Furlano (associazion Culturaglobale) e à valutât 23 candidâts che a àn scrit sul teme de "Tradizions, storie e ambient dal teritori dal autôr".

Te sezion students e à vincût Rossella Dosso de III D de scuele secondarie di prin grât "G. Pascoli " di Cormons cul test "Arturo Dosso e l'incontro con Dolfo". A àn meritât la segnalazion ancje Leonardo Fumai de II A de stesse scuele cun "E se incontriamo i cinghiali? Una corsa sul Collio con gli amici" e Sara Klede de classe cuarte de scuele "L. Zorzut" di Breçan cun "Leto v Krminski Gori".

Lis notis sui autôrs a son in alegât al comunicat dai 19/05/2013 par talian.

Elisabetta Pozzetto

Regjon Autonome Friûl Vignesie Julie
[ARLeF – Agenzie Regjonâl pe Lenghe Furlane](#)
0039 0432 555724 fax 0432 204158 mob 0039 335 8002058